

Script of Morning Gojri News Bulletin 31 December 2024 at 1015Hrs

ما رنینگ گو جری نیوز بلیٹن مو رخہ 31 دسمبر 2024

یوہ آکاشوانی جموں ہے باغ علی طاہرتیں خبر سُنو۔

ISRO

بھارتی خلائی تحقیقی تنظیم اِسرو نے سپا ڈیکس ناں غا مشن نانہہ گذشتہ رات سری سری ہری کوٹہ تیں کامیابی سنگ خلاء مانہہ روانہ کر دتو ہے۔ اِسرو غی پی ایس ایل وی سی 60 نے کامیابی سنگ دو سیٹ لا ئنڈر دی چیسر تے ایس ڈی ایکس صفر 2 نانہہ خلاء مانہہ چھوڑیا جان غے بعد زمین غا نچلا مدار مانہہ تعینات کر دتو ہے۔ اس مشن غا روانہ کرن غو مقصد آئندہ خلائی مشناں با رے صلاحیت پیدہ کرنو ہے، جن مانہہ چن غا مشن تے بھارتیہ انٹریکشن اسٹیشن شامل ہیں۔ اس مشن غی کامیابی سنگ اِسرو غی خلائی مہم غی صلاحیتاں مانہہ مزید بابدو ہو سکے گو۔ اس مشن غا کامیابی سنگ داغیا جان غے بعد اِسرو غا چیرمین ایس سومناتھ نے جانکاری دیتاں واں دسیو ہے جے آئندہ چند روز غے دوران یہ دوئے سیٹلا ٹ 20 کلو میٹر غو سفر کریں گی تے اس غے بعد ان غا ملن تے ڈاکینگ عمل غو آغاز ہو جائے گو۔

LG JU Council

لیفٹنٹ گو رنر منوج سنہا نے کل راج بھون جموں مانہہ جموں یونیورسٹی غی 88 ویں میٹنگ غی صدارت کی۔ یونیورسٹی کو نسل نے میٹنگ غے دوران یونیورسٹی غا تدریسی تے انتظامی کم کاج مانہہ مزید بہتری لیان با رے غور کیو۔ میٹنگ غے دوران یو جی سی تے قومی تعلیمی پالیسی سال 2020 غا طے شدہ رہنما سطور غے مطابق کئی ضابطاں نانہہ اپنان تے شامل کرن با رے تجویزاں نانہہ منظوری دتی گئی۔ لیفٹنٹ گو رنر نے یونیورسٹی انتظامیہ نانہہ ہدایت کی ہے جے یونیورسٹی غا تدریسی عملہ تے غیر تدریسی عملہ غی آسامیاں نانہہ پُر کرن نالے ترقیاں غے متعلق معاملات نانہہ نیہڑن غا سلسلہ مانہہ مہم غو آغاز کیو جا ئے۔ انہاں نے ای آفس نانہہ بہتر بنان تے یو نیورسٹی غا چل رہیا پروجیکٹاں غی بروقت تکمیل با رے وی ضروری ہدایت کی ہے۔ اس میٹنگ مانہہ ہو ر لوکاں غے علا وہ اعلیٰ تعلیم غی وزیر سکینہ اتو تے محکمہ غا ایڈیشنل چیف سیکریٹری شانت مٹو، لیفٹنٹ گو رنر غا پرنسپل سیکریٹری ڈاکٹر مندیپ بھنڈاری تے یونیورسٹی غا وائس چانسلر پروفیسر اومیش رائے نے وی شرکت کی۔

Dy CM

نائب وزیر اعلیٰ سُریندر کمار چودھری نے کل متعلقہ افسراں نانہہ ہدایت کی ہے جے کان کنی با رے طے شدہ ضابطاں ور سختی سنگ عمل کیو جا ئے۔ اور کان کنی غا عمل غے دوران ماحولیاتی تشویشاں نانہہ پیش نظر رکھیو جا ئے۔ نائب وزیر اعلیٰ نے ان خیالات غو اظہار سول سیکریٹریٹ جموں مانہہ کان کنی محکمہ غی کارکردگی غو جائزو لین غی خاطر بلائی گئی اک میٹنگ غی صدارت کرتاں واں کیو۔ میٹنگ مانہہ محکمہ غا ڈائریکٹر ایف اے سی غا ممبر سیکریٹری، دوجا متعلقہ سینئر افسر تے فریق شامل ہوا۔ اُن غو کہنوتھو جے طے شدہ ضابطاں غی خلاف ورزی برداشت نہیں کی جا ئے گی۔ انہاں نے کان کنی غے دوران ماحولیاتی تشویشاں نانہہ پیش نظر رکھن غی ضرورت ور زور دتو۔

Home Sec Review

مرکزی سیکریٹری داخلہ گو وند موہن نے کل سرینگر ماہہ جموں کشمیر غی سلامتی صورتحال غو جائزو ليو ہے۔ میٹنگ ماہہ سلامتی دستاں، پولیس تے خفیہ ایجنسیاں غا سینئر افسراں نے شرکت کی۔ یوٹی ماہہ دہشت گردانہ کاروائیاں تیں علا وہ میٹنگ غے دوران کنٹرول لائن غی صورتحال ور وی غور کیو گیو۔ اُنہاں نے ہدایت کی ہے جے جموں کشمیر ماہہ امن ماہہ آئندہ مہینہ غے دوران یوم جمہو ریہ تقریبات غے پیش نظر خلل پین تیں روکیو جائے۔

PSA

پولیس نے کل عوامی تحفظ قانون پی ایس اے غے تحت اُدھم پور غا بسنت گڑھ علاقہ تیں دہشت گرداں غا اک ساتھی محمد رفیق نانہہ گرفتار کر غے معاملو درج کر ليو ہے۔ یوہ شخص بلوتا، چگلا بسنت گڑھ غو بسنیک دسیو گیو ہے۔ اس علاقہ تیں پی ایس اے غے تحت گرفتار کیا جان آلو یوہ پنجووں شخص ہے۔ یوہ شخص بکھ بکھ دہشت گردانہ کاروائیاں ماہہ ملوث تھو۔ تے اس توں علا وہ یوہ اپنی گرفتاری توڑی دہشت گرد تنظیم غو سہولت کار رہیو۔

Weather

محکمہ موسمیات نے اج سردی غی لہر سنگ خشک موسم غی پیشنگوئی کی ہے۔ آج موسم خشک رہن غے نال نال آبر آلود رہے، جدکہ کُجھ اُچا پہاڑی علاقہ ماہہ نواں سال غی پہلی رات نانہہ برفباری غی پیشنگوئی وی کی گئی ہے۔ اس توں علا وہ آئندہ 3 توں 6 جنوری توڑی موسم آبر آلود رہے، جد کہ جموں غا میدانی علاقہ ماہہ ہلکی تیں درمیانہ درجہ غی بارش، تے پہاڑی علاقہ ماہہ برفباری غو امکان ہے۔ 4 تے 5 جنوری نانہہ بارش تے برفباری ماہہ شدت غو امکان ظاہر کیو گیو ہے۔ ان دو دناں ماہہ اُچا پہاڑی علاقہ ماہہ برفباری غو خدشو وی ظاہر کیو گیو ہے۔ سیلابیاں، مسافراں تے ٹرانسپورٹ حضرات نانہہ محکمہ ٹریفک تے ضلع انتظامیہ غی طرفوں صلاح دتی گئی ہے جے وے برفباری غا امکان نالے سڑکاں ور تلکن تے صفر ڈگری سلیبس تیں درجہ حرارت ماہہ کمی آن غے پیش نظر محکمہ ٹریفک تے انتظامیہ غی طرفوں اجازت ملن غے بعد ہی سفر شروع کریں۔ اسے دوران دسیو گیو ہے جے جموں سرینگر قومی شاہراہ ور ٹریفک پلا رکاوٹ جا ری ہے، جد کہ تاریخی مغل روڈ جہیڑو پونچھ تے راجو ری ضلعان نانہہ وادی کشمیر سنگ جوڑے دو پاسا تیں ٹریفک غی آؤ جائی واسطے بند ہے، حالانکہ شوپیاں آلا پاسا تیں پیر کی گلی تک گذشتہ رات توڑی برف ہٹان غو کم مکمل کر ليو گیو ہے تے اس راہ اُمید ہے جے سڑک نانہہ گڈیاں غی آؤ جائی واسطے تاؤلاں ہی کھول دتو جائے۔

اس غے نال ہی خبراں غو یوہ بلیٹن ختم ہوؤ۔